



藝術典第四百五十四卷

醫部彙考四百三十四

小兒吐瀉門一

宋錢乙小兒直訣 吐瀉兼變證治

五月二十五日以後吐瀉壯熱此臟腑中九分熱也傷熱乳食吐而不消瀉色深黃玉露散主之

六月十五日以後吐瀉身溫臟腑六分冷也嘔吐乳食不消瀉色黃白口乾作渴者食前少服益黃散食後多服玉露散 七月七日以後吐瀉身涼三分熱七分冷也不乳多睡悶亂哽氣出氣睡

臥露睛唇白多噦亦用益黃玉露二散主之 八月十五日以後吐瀉身涼不乳乾噦瀉青褐水

無陽也當用益黃散吐瀉乳食不化時時下痢肌肉消瘦此脾胃虛寒也用木香丸夏月不可服如有冷證則少服之其身溫壯熱或瀉痢紅黃赤黑此脾胃實熱也用黃連丸冬月不可服如有熱證則少服之 註按前法卽內經用寒遠寒用熱遠熱之本旨又云有假者反之雖違其時以從其證

蓋胃傷則嘔吐脾傷則泄瀉脾胃俱傷則吐瀉並作前證若傷辛熱停滯嘔吐或大便下痢者用

六君子加黃連吳茱萸木香若停滯已去泄瀉不已用四君子加肉蔻骨脂若傷生冷腹痛瀉痢青白用六君子加砂仁木香炮薑若傷魚肉等物用六君子加山楂砂仁若瀉紅黃赤黑諸臟皆熱也先用香連丸後用補中益氣湯送香連丸若瀉痢青白乳食不化者用人參理中丸若吐瀉昏睡而露睛者用五味異功散睡而不露睛者用玉露散若吐而手足俱熱或喜冷飲食或睡不露睛者用瀉黃散或手足冷或惡冷飲食或睡而露睛者用六君子木香然木香黃連二丸雖能攻剋病邪不無傷損脾胃治者審之

若吐乳瀉黃傷熱乳也吐乳瀉青傷冷乳也皆當下之吐瀉昏倦睡不露睛者胃實熱也吐痰涎及綠水者胃虛冷也

註

按前證若兒自受驚或乳母恚怒致兒吐瀉青色者宜用異功散加柴胡若

母食厚味而乳熱者用東垣清胃散母飲酒而乳熱者用葛花解醒湯子服一二匙若飲燒酒而乳熱或子母身赤或昏憤服冷米醋三五杯多亦無妨兒服一二匙若母停滯生冷而乳冷者母服養胃湯子服調中丸若母停滯而變熱乳者母服大安丸子服五味異功散若母鬱怒傷肝脾而乳熱者用歸脾湯逍遙散若母脾虛血弱而乳熱者用六君子加芎歸若母氣血虛而乳熱者

子母俱服八珍散若母勞役發熱而乳熱者子母俱服補中益氣湯若因母怒動肝火而乳熱者用五味異功散加柴胡山梔其吐痰涎及白綠水者肝木乘脾土之虛寒證也用六君子加柴胡木香大凡吐乳瀉青色者屬驚法當平肝補脾吐瀉青白色者屬寒法當溫補脾土前諸證若手足指熱者屬實手足指冷者屬虛此亦驗法也

初生十日內吐瀉壯熱不乳或乳不消或白色先用白餅子下之後用益黃散和之 初生下吐

因穢下咽故也用木瓜散主之凡初生急須拭淨口中否則啼聲一發穢物嚙下致生諸病 註按

芽兒初生之患多因乳母不慎七情不節厚味傳兒爲病當審其因以調治其母前所用之藥恐臟腑脆嫩不能勝受治者審之

金劉完素六書 瀉痢

五臟皆言熱證無寒冷證亦有謂瀉痢小便青白不澀爲寒水穀不化而色不變吐痢腥穢澄澈清冷青白不澀身涼不渴脉遲細而微者寒證也 穀雖不化而色變非白煩渴小便黃赤而澀者

爲熱證世傳小兒吐痢霍亂食乳未及消化而痢尙白便論爲寒證誤矣仲景云熱邪不化穀豈爲

寒也

元張從政儒門事親 身熱吐瀉

凡小兒身熱吐瀉腹滿不進飲食可急與牛黃通膈丸下過五行則自愈矣蓋乳食便屬水甚則成濕以治濕法治之用燥熱之藥非也 凡小兒水泄不止可用五苓散與益元散各停用新水

調下三二錢頻服不拘時候若暴速注下甚者屬火涼膈通聖等散治之用者勿輕非深於造化者

未易此語

水瀉

小兒暴注水瀉不止內經曰此名暴速注瀉久而不愈者爲涌泄注下此乃火運太過之病也火注暴速故也急宜用新汲水調下甘露飲子五苓散天水散或用井花水煎此藥放冷服之病卽瘥矣不可用御米殼乾薑豆豉聖散子之類縱然瀉止腸胃氣滯不通變爲腹脹此法宜分陰陽利水道乃爲治法之妙也

久瀉不止

凡小兒久瀉不止至八九月間變爲秋深冷痢泄瀉青白時時撮痛乳瓣不化可用養脾丸如黍米大每服二三十丸米飲送下日進三服則愈益黃散亦可用之 凡治小兒之法不可用極寒極

熱之藥及峻補峻瀉之劑或誤用巴豆杏仁硫黃膩粉之藥若用此藥反生他病小兒易虛易實腸胃嫩弱不勝其毒若治之宜用分陰陽利水道最爲急用桂苓甘露散之類

朱震亨幼科全書 嘔吐

有物無聲曰吐有聲無物曰嘔有聲有物曰嘔吐其證有三有寒有熱有食積傷 凡寒吐者吐

時少而出物多此胃家受寒也或用胃苓丸煨薑湯吞或以理中丸治之寒吐食不化不惡食

凡熱吐者吐時多而出物少此胃家有熱也以二陳湯加黃連煨乾薑治之熱吐食化不惡食

凡食積吐者要分三焦明白俱能食如食時卽吐者此積在上焦胃口也宜用淡鹽湯吞下後用鵝

翎毛掃口中令其吐盡舊積以二陳湯加煨乾薑神麴炒麥芽炒杏仁治之 如食下一二時而

吐者此積在中焦胃下口過小腸上口處也先以丁香脾積丸通去舊積後以二陳湯加消導藥治

之 如早食晚吐晚食早吐者此食在下焦小腸口下過大腸口上處也先以丁香脾積丸下之

後以二陳湯加消導藥治之消導藥如神麴麥芽砂仁香附之類如嘔吐久而諸藥不納者此胃口伏火關格之病用理中湯加童便猪膽汁全炒煎服卽止神效妙不可言 如嘔吐出蛔蟲者以

理中湯加烏梅一箇附子一小片黃蘗川椒一服卽止 如嘔吐後而瘦弱者只以集聖丸調之

如諸吐不納藥者此陰盛拒陽也必加童便猪膽者蓋童便味酸鹹性寒膽汁味苦性寒以和理中

湯服則陰體漸消陽性乃發此內經所云伏其所主先其所因也非吾子孫不示 凡吐不止目

上眦頭後仰者不治 祖傳治嘔吐只用胃苓丸煨薑湯送下不問寒熱皆效凡吐不止服藥無

效更加煩悶不治

### 西江月

嘔吐飲食不納任從湯藥難嘗此爲陰盛隔孤陽到是時醫魔障參朮煨薑熟附烏梅童便尤良猪膽全入慢精詳此法應如影響 一等虵蟲吐出此爲虵厥多陰烏梅丸子效如神一服虵安吐定又有咳而嘔者化痰順氣須明如常吐嘔只胃苓湯用煨薑作引

### 泄瀉

凡泄瀉皆屬濕其證有五治法以分利升提爲主不可一例混施如泄瀉青白或乳食不化腸痛四肢冷面晁白不作渴者此寒濕也其證多得於冬以五苓散作引吞化理中丸卽止如寒甚不止者理中湯加附子一片卽效

如泄瀉黃稠腹痛作熱面紅口渴此熱濕也其證多得於夏以五苓散加滑石甘草木通治之甚者以玉露散理中湯卽效

如泄瀉不住成黃水者或渴或不渴此風濕也其證多得於夏以五苓散加防風蒼朮羌活治之

如久瀉腸滑不止者此濕傷元氣下

陷也宜升提之藥四君子湯加升麻防風烏梅治之或用四君子湯吞下七味肉蓯蓉丸亦效

如泄瀉酸臭腹痛面黃帶熱不喜飲食者此食積也先以丁香脾積丸推去其積後以集聖丸調之如泄瀉久作渴不止者只以白朮散多煎服之未有不效者

如泄瀉久目無神口略張四肢冷

好睡以四君子湯調之多服有效甚者加熟附子一小片煨乾薑服之

如泄瀉久身熱不退者

只以調元湯治之此虛熱也不可妄用寒涼之藥甚者加煨乾薑卽效

凡泄瀉後人事黃弱者

只用集聖散服之

祖傳治泄瀉不問寒熱只用胃苓丸兼一粒金丹以車前子全炒米湯治之

凡治久泄不止精神美好面青唇紅者不治變成白痢者不治脉沉細遍身皮冷不乳食作渴不止

者不治又成驚搐者不治大孔如竹筒不收閉者不治滑泄不止者不治大肉消瘦者不治  
治泄瀉不問輕重只要乳食如常不生他證者則易愈

清江引

泄瀉五虛真莫測六脈細欲絕腸滑魄戶開脾寒大皮折禁口飲食不下咽

少氣

醫得此疾真妙手

參芪朮羌附甘草石菖蒲訶皮罌子粟若還見效都無妨蚶蚶補假如服藥全無效金液神丹妙附  
子與硫黃法製家傳奧起死回生減些兒堪救療

西江月

夏月人多泄瀉腹痛煩渴相攻豬苓澤瀉茯苓甘草乾薑多用白朮黃連滑石人參砂礬溫中升  
麻提氣妙無窮更把烏梅煎送

夏月雨多傷濕宜利小便爲先豬苓澤瀉與黃連梔子茵陳解

散羌活青皮枳實茯苓赤者相參木瓜蒼朮同煎黃蘗加些靈驗

泄瀉祕傳治法等閒不語

時人如今傳授與兒孫勝似良田萬頃初次且行淡滲溫中以次施行三升四塞救孩嬰此法古今

永定 泄瀉緣何發作只因水穀無分所以淡滲法先行小便長而泄定滑石車前赤茯苓參白

朮豬苓甘草澤瀉與砂仁薑棗煎時作引

淡滲行而還泄須防穀氣中虛溫中丸散不須拘但

要一時泄佳白朮人參砂藿炙薑炙草依書烏梅熟附澤苓豬引用棗薑作主

溫中若猶不效

中氣下陷須提人參白朮與黃芪甘草乾薑炙取澤瀉豬苓赤茯苓升麻熟附烏梅柴胡白芍與當歸  
薑棗引兒休棄 以次升提未止此時腸滑難收塞因通用更何憂擊其惰歸可救參朮炙薑炙

草烏梅粟殼相扶升麻訶子芍歸求薑棗同煎溫服

法盡泄還仍舊其間吉少凶多假饒父母

沒奈何要爾醫人休錯參朮茯苓陳薑草砂仁荳蔻粟訶乾蟾蘆薈木香和赤石脂丸調可

泄瀉

時常作渴白朮散子如仙人參白朮木香兼乾薑藿香葉片甘草茯苓七味烏梅加上同煎臨時更  
帶伏龍肝此法千金不換 泄瀉如常法治不須別用心機只將丸藥胃苓醫三服自然停息如

此不能取效依前數法支持吾將心法教人知纔顯明醫三世

五六月間泄瀉其間寒少熱多

理中丸子救沉疴玉露散調服可不效四苓作引用吞理中調和自然泄止不蹉跎活得多人念我

### 吐瀉

吐瀉之證有三有寒有熱有積治法略與泄門相似觀者詳之

凡吐瀉兩腮紅足脛熱好飲水

身上熱此熱證也治法以胃苓丸一粒金丹全車前草燈心湯送下

凡吐瀉面晁白足脛冷不

作渴如有熱者此寒證也治法先以理中湯卽止不止便以益黃散治之或胃苓丸肉荳蔻丸治之  
凡吐瀉惡食或不乳心腹痛吐瀉所出之物皆酸臭此食積也先去食積以感應丸推之後以胃苓丸調之或食脾積丸亦可  
凡吐瀉日久漸漸瘦弱作渴作熱久不治必成壞證用加減補中湯治之

西江月

大凡男女吐瀉陰陽順逆當明男逢泄盛下無陰女子吐多不應出物多而數少此爲寒食相侵如  
逢物少數頻頻火盛細加體認  
吐瀉若然同見此名霍亂陰陽只消一貼理中湯上吐下瀉了  
當服藥若還不效再加熟附煨薑烏梅作引是良方莫與俗人誇獎  
吐瀉時時作渴諸般湯藥  
無靈飲湯飲水腹腫膨束手待觀死定急飲茯苓飲子時時與兒調停須臾吐止火邪寧纔與理中  
對證

明魯伯嗣學嬰童百問 嘔證吐乳證

仲陽云初生下拭掠小兒口中穢惡不盡嚥入喉中故嘔吐及多生諸病嘔吐者有聲也吐者吐出乳也凡小兒乳哺不宜過飽若滿則溢故令嘔吐胃中納乳如器之盛物杯棬之小不可容巨椀之物兩驟則沼溢酒暴則卮翻理之必然乳母無知但欲速得乳兒長大更無時度或兒睡著而更嚙乳豈有厭足受病之源自此漸至日深導其胃氣之虛慢驚自此而得可不慎乎此候但令節乳爲上甚者宜令斷乳先此乳母可服調氣之劑兒服消食丸化乳壯胃爲上議曰吐乳嘔乳此證有數般有冷有熱當自辨認若吐自口角出此是乳多消化不及滿而則溢此非病也常服消乳丸異功散當令乳母節乳爲上冷吐可服觀音散香朴散快脾等藥熱吐則頭額溫有黃涎而渴小便赤少此是熱吐多是傷暑熱者有此證乳母同服香薷散五苓散又有風痰吐乃是傷風不解吐乳夾痰若經久必然生風仍宜下疏風化痰藥竹茹湯去桂五苓散青州白丸子溫膽湯又當留心調治紫霜丸亦可服

熱吐

小兒秋夏伏暑多有熱吐何以別之或有黃涎頭額溫五心熱小便赤而少或脣乾而煩渴先令乳

母服香薷散五苓散兒服竹茹湯五苓散熱甚者大柴胡湯去大黃服或小柴胡湯亦可熱極者可服大承氣湯其效如神玉露散亦可服

寒冷嘔吐噦逆

小兒感受風冷或食生冷瓜果過多胃口停寒以致吐食吐乳並用理中湯主之或釀乳法消乳丸異功散香朴散茯苓半夏湯二陳湯人參散麝沉散俱可服

霍亂吐瀉

小兒吐瀉有身溫者有身熱者有身涼者有吐瀉成驚風者有夏月傷暑吐瀉者有初生三日內吐瀉者仲景云小兒初生三日內吐瀉壯熱不思乳食大便青白乳食不消或白色是傷當下之後和胃仍用白餅子和胃用益黃散主之三日以後至十日吐瀉身溫涼不思乳食大便青白色乳食不消此上實虛下也用益黃散加減治之又傷風吐瀉身溫乍涼乍熱多氣兼大便黃白色嘔吐乳食不消時時咳嗽更有五臟兼見證當服入臟君臣藥先大青膏後益黃散主之又吐瀉身熱多睡能食乳飲水不止吐痰大便黃水皆爲胃虛熱渴吐瀉也當生胃中津液以止其渴止後用發散藥止

渴多服白朮散發散大青膏釣藤飲主之又吐瀉身涼吐沫瀉青白色悶亂不渴咽氣長出氣睡露睛此傷風荏苒輕怯因成吐瀉當補脾後發散補脾益黃散發散大青膏釣藤飲夏至後吐瀉身壯熱熱證也或因傷熱乳食嘔吐不消瀉深黃色玉露散主之五苓散亦佳香薷散車前子散可選而用之若面色青黃知風熱在脾髮直怕人眼不合是心中有毒涎更胃逆風搖可服定命丹

### 冷瀉

湯氏云此乃脾虛受冷致令水穀不化泄瀉注下仲陽云小兒不能食乳瀉褐水身冷無陽也當治脾益黃散主之古今不同當依加減法用之始爲穩當冷積瀉沒石子丸極效人參散理中湯加減服尤佳更加肉荳蔻則止來復丹不換金正氣散皆可觀音散銀白散加減調治乃平和之劑也

### 熱瀉

湯氏曰小兒熱瀉者大便黃而赤或有沫乃臟中有積或因乳母好飲酒或嗜熱物或生下傷溫蘊熱醫者不明但用荳蔻訶子等藥服之如水澆石既不識其證故不辨其冷熱用藥又不得其法焉得取效此證當以小便赤少口乾煩躁爲驗治法當用錢氏白朮散去木香用之五苓散去桂亦可

服其熱甚者四逆散大柴胡湯去大黃服之殊驗也更用黃連丸等劑亦佳調中湯去大黃加黃連枳殼如夾熱而瀉太陽與少陽合病自下利者與黃芩湯嘔者加半夏也又有挾熱瀉利而小便祕澀赤甚者四順清涼飲主之

### 傷食瀉

湯氏云凡此瀉不宜便補先用消食藥或用紫霜丸取其積盡然後可補經云食瀉重當取痞虛用補虛治食瀉與香橘餅子加減觀音散調中湯散以意加減凡傷食瀉不可卽止宜節飲食當用進食丸取下食積令盡次以錢氏加減益黃散只一服可止此乃切要治法然後異功散四君子湯調理必取全安有腹中雷鳴下利者生薑瀉心湯主之如冷積釀瀉用香朴散止之白朮散以和氣調胃調中散保安丸能止傷食瀉感應丸沉香煎三稜煎皆可服

### 驚瀉

仲陽云慢驚病後或吐瀉胃虛或氣弱因驚眼白如淡墨下糞青黃此瀉合溫補至聖保命丹釣藤飲主之或乳隨糞下消乳丸進食丸主之或微渴心脾喘躁狂熱此瀉尤難治辰砂五苓散主之冷

者定命飲子主之後與溫驚朱君散睡驚太乙丹

薛氏保嬰撮要 霍亂吐瀉

錢仲陽云吐瀉壯熱不食或乳不消是傷乳也宜白餅子下之後用益黃散和胃若吐瀉身溫不乳大便青白此上實下虛也用益黃散加減治之大凡吐瀉身溫乍涼乍熱氣竈大便黃白吐乳不消此傷風熱也先服大青膏發散後服益黃散和胃若吐瀉身熱多睡能乳吐痰大便黃水胃虛也先用白朮散生津止渴後用大青膏釣藤飲發散風邪若夏至後吐瀉身熱或吐乳瀉黃此傷熱乳也用玉露散之類凡瀉乳腹痛按之而哭者食積痛也用白餅子下之按之不哭者脾胃氣虛也用五味異功散補之手足指冷者脾氣虛寒也用異功散加木香傷風吐瀉者風木剋脾土也亦用前藥若飲熱乳而瀉黃者濕熱壅滯也用四苓散如不愈或反甚者元氣復傷也用白朮散瀉而腹中重墜者脾氣下陷也用補中益氣湯若服剋滯之劑而腹中窄狹者脾氣虛痞也用六君子湯若面黃瀉青脾虛而肝乘之也用六君柴胡升麻木香若多噫瀉黃心脾氣虛也用六君炮薑升麻生下半月旬日內吐者止宜調治其母恐嬰兒臟腑脆弱不勝藥餌故也

徐春甫古今醫統 嘔吐

嘔者有聲也吐者吐出乳食也凡小兒乳哺不宜過飽若滿則溢故令嘔吐乳母無知但欲速得兒長更無時度或兒睡著而強乳自此受病之源漸至日深遂成嘔吐甚者宜漸斷乳先令乳母服調氣之劑兒服消食丸化乳壯胃爲上蓋吐乳嘔乳證有數般有冷吐有熱吐當審辨之若吐自口角出此是乳多不能消化滿而則溢此非病也常服消乳丸熱吐則頭額溫或有黃涎五心熱小便赤少或脣乾而煩渴多是暑月傷暑或致此證乳母服香薷散五苓散兒服香薷湯五苓散冷吐則清涎夾乳吐出小便清而多由乳母當風取涼解脫致令風冷之氣入乳令乳變敗兒飲之則冷氣入胃故嘔吐也乳母宜捏去舊宿乳服理中湯快氣助胃之劑次用釀乳法茯苓半夏湯加減觀音散快胃之藥又有風痰吐者乃是傷風不解吐乳夾痰久必生風宜服青州白丸子半夏散疏風化痰之劑

瀉泄

瀉泄乃脾胃顛病凡飲食寒熱三者不調此爲內因必致瀉泄又經所論春傷風夏飧泄夏傷暑秋